

## REGIONAL NEWS

HEADLINES:-

1. Election department hotute chuan Mizoram Police sang chuang state danga inthlan duty a chhuakte'n vote an thlak ve theihna tura Election Commission of India an dil chu vawi 2 hnawl a ni tawh niin an sawi.
2. Khawzawl leh Champhai district bawrhsapte hmalaknain Aizawl leh Champhai inkar kawngpui hnawhtu leivung chu tukin khan lirthei chitin kaltlang theihin tihtlang a ni.
3. Vawk pulhri African Swine Fever avangin kum hian Mizoram chhungah vawk 817 an thi tawh a, vawk 1,034 suat a ni tawh bawk.
4. Lok Sabha inthlanpui thawh 5-na, naktuka nei turin ruahmanna peihfel a ni.

&lt;&gt;&lt;&gt;&lt;&gt;

POLICE POLLING

Election department hotute chuan Mizoram Police sang chuang state danga inthlan duty a chhuakte'n vote an thlak ve theihna tura ngenna an siam chu Election Commission of India-in vawi 2 a hnawl tawh a ni a ti.

Election department hotute chuan state pawna inthlanna buaipui tura kal Mizoram Police-te'n vote an thlak theih vena atan hian an dipui thu an sawi a, Election Commission hian an ngenna chu vawi 2 a hnawlsak tawh thu leh a chhan an hriat bik loh thu an sawi a ni. Puan tawh angin MPC chuan Election Commission-a Principal Secretary SB Joshi hnena nimina lehkha an thehluhah state pawna Police duty-te'n vote tla chhiar hun, Jun ni 4 hma ngei a vote an thlak theihna tura ruahmanna siam turin an ngen a. Vote 1,047 hian Mizoram Lok Sabha bial inthlan result turah awmze thui tak a nei thei dawn tih an tarlang. Electronically transmitted postal ballot system (ETPBS) hmanga vote an thlak theih reng lai a ruahmanna siamsak an ni lo chu hriatthiam har an tih thu an sawi a ni.

Mizoram Police mi 1,047-te hi Mizoram Lok Sabha bial inthlan hma daiha tirh chhuah an ni a. Election Commission-in hun hmasa lama postal ballot hmanga vote thlak titawpa an puala Facilitation Centre-a vote thlak buatsaih tura tih an nih lai-in Mizorama candidate chinfel a nih hma a an duty-na hmun pantir an nih avangin ruahmanna siamsak hman an ni lova. Hemi hi a chhan ni bera lang chu he lama mawh latu Ministry of Home Affairs-in Mizoram Chief Electoral Officer pisa kaltlang lova Home department hnena lehkha an rawn thawn a, home lamin hmanhmawh taka an thawn chhuah vang a nih an rin thu an sawi a ni.

April ni 19-a Mizoram Lok Sabha bial inthlanna-ah khan vote za zela 56 point 87 chauh a ni a. Tunhma lam inthlan lo awm tawh ngaihtuahin vote tla hi a tlemhle a ni.

&lt;&gt;&lt;&gt;&lt;&gt;

## REFUGEES

Tukin khan Bangladesh atangin nunau raltlan 65 chu an sahimna zawngin Lawngtlai district-ah an rawn luh belh.

Bangladesh, Chittagong Hills Tract a tlangmite'n thuneihna sang zawk an ngiat vanga Bangladesh Sipai leh Kuki-Chin National Army (KNA) te tharum hmanga inbeihna nghawng kal zelah tukin zinglam dar 3 vel khan Bangladesh atanga an sahimna zawnga tlanchia, mi 65 te'n Lawngtlai District a Vathiamtui khua an lut. Heng raltlante hi Bawm hnam niin Lawngtlai a kan Corr Lalnggheta Ralte chuan a sawi a. Mipa 38 leh hmeichhia 27 niin, nunau leh kum upa lam deuh te an ni a, an zingah hian damlo pawh an awm nual ni a sawi a ni.

Raltlan rawn lut thar te hi Vathuampui khawtlang chuan lo dawngsawngin, a tul angin an eitur leh tawm hulna turte an buaipui nghal a. Sorkar thuneitute lam pawhin rang takin thil awm dan an ngaihven nghal a ni.

<><><>

## HIGHWAY CLEARED

Khawzawl leh Champhai district bawrhsapte hmalaknain National Highway-06 (Aizawl leh Champhai inkar kawngpui) hnawhtu leivung chu tukin dar 9 vel atang khan lirthei chitin kaltlang theihin laih tlang a ni.

Khawzawla kan Corr sawi danin tukin zing dar 6 leh a chanve atang khan leivung tlak avanga kawngpui hnawh then fai hna thawh leh a ni a. Zing dar 09 vel atang khan kawng hi lirthei zawng zawng kal theihin laih tlang a ni. Puan tawh angin Khawzawl Vengthar VC leh NGO hrang hrangte'n Artlangpeng, Khawzawl Vengthar atanga Tuimuk panna kawng Shri Balaji Construction Company (SBCC) ten National Highway-06 an laih avanga an tihpin tak chu an ngen anga Balaji Company ten laih that hna an thawh mai loh avangin kawng sial hnatlang hi an nei ta a. He kawng sial that hnatlang an thawh avang hian National Highway hi leivungin a hnawh ta a ni.

Khawzawl Vengthar VC leh All NGO-te hian vawi engemawzat sawrkar lam thuneitute leh Balaji Company-te hi lo dawr tawhin, kawng hi sial tlang mai tur angin Company lamte hi beiseiawm takin an lo awm tawh thin niin an sawi a. Kar kal ta Thawhlehi a Balaji Company-ten kawng lai tlang tura thutlukna an lo siam tawh chu an bawhpelh tak avangin Ningani atang khan VC leh All NGO-te chuan kawngsial hnatlang hi tanin National Highway hi motor kal theih lohian hnawh ta a ni.

Leivung paih fai nan hian Balaji Company lam in excavator rawn tumin , operator hi Khawzawl DC in a ngaihtuah sak a ni.

Hetihlai hian Khawzawl kianga National Highway No. 6 kawngpui tihpin a nih chungchangah Champhai South bialtu MLA, Lt.Col. (Rtd) Clement Lalhmingthanga chuan hma la zui zelin nimin tlai khan Champhai bawrhsap chu thil awmdan a zawt a. Khawzawl bula NH-6 an block a la tlang lo tih a hriatin a thusawi an ngai pawimawh tawk lo deuh a nih chuan sawi nawn tawh lo a, a tul anga hma lak zui a tum thu a hrih nghal.

Tukin zing khan Champhai leh Khawzawl district bawrhsap-te'n Champhai South bialtu MLA chu telephone hmanga bia-in kawngpui chu mipui te kal theiha an sial kuak thu leh road sign pawh khaw chungah an dah vek thu an hrih a ni. Kawngpui enkawl dan an bawh chhiat a vang a a sawhkhawk (repercussions) sang tak a awm theihzia leh mahni duhthu a dan palzut mai mai tur a nih loh zia Pu Clement Lalhmingthanga hian a lo hrih nghal bawh a ni.

<><><>

## PENTECOST DAY

Vawiin hi Pentikos ni a ni a, he ni hi Kohhran ni pawimawh a nih avangin Presbyterian kohhran chuan Sunday School ai-ah chawhma, chawhnu leh zanah Pentikos Ni thupui ngaihthlak turin ruahmanna a siam.

Chawhma Inkhawmah 'Thlarau Thianghlim chuan Isua nihna a puang' tih thupui hmanga thusawi ngaihthlak a ni a, chawhnu inkhawmah 'Thlarau Thianghlimin sual kan nih min hriattirin thu takah min hruai lut' tih thupui hman a ni a, zan inkhawmah 'Thlarau Thianghlim chuan Kohhranah min hruai lut' tih thupui hmanga thusawi ngaihthlak a ni bawk ang. Pentikos tih awmzia hi 'Sawmngana' tihna a ni. Thuthlung Hlui-ah chuan Kalhlen Kut tiak ni atanga ni sawmnganaah an hmang thin a, Thuthlung Thar hunah erawh chuan Isua Thawhleleh tuk (Easter) atanga ni 50-naah hman a ni.

Zan inkhawmah Presbyterian Church of India General Assembly pualin tawngtai rual a ni ang a, zan Inkhawm thawhlawm pawh PCI General Assembly pual tur a ni ang a, thawhlawm lak khawm te hi Bial Treasurer kaltlangin Synod Office-ah thehluh tur a ni.

Baptist Church of Mizoram (BCM) kohhrante chuan vawiin Pentikos Ni pual hian chhungkuaa Thlarau Thianghlim pawimawhna tih thupui hmangin chawhma inkhawmah Pathian thuchah an ngaithla a. BCM kohhrante hian kar hmasa ni 13 atanga vawiin Pathianni thleng hian Kristian Chhungkaw Chawlhkar an hmang a, zantin thuzirna hun an buatsaih thin a ni.

Chhandamna Sipai Pawl (The Salvation Army) pawhin chawhma dar 10 atang khan Thianghlimna Inkhawm an nei a, hetah hian 'Thlarau Thianghlim nun dan danglam tir tu' tih thupui hmangin thuchah an ngaithla a. Chhandamna Inkhawm zanina hman turah 'Thlarau Thianghlim nei rawh u' tih thupui hmangin Pathian thuchah ngaithlak a ni ang.

<><><>

## ASF RECURRENCE

Vawk pulhri African Swine Fever (ASF) avangin kumin hian Mizoram chhungah vawk 817 an thi tawh ni a report a ni a, ASF vanga vawk suat tawh zat chu 1,034 a tling a ni.

Animal Husbandry & Veterinary Dept in a chhinchhiah danin vawiin khan ASF vangin Chhingchhip khua-ah vawk pakhat a thih belh leh a, vawiin vek hian vawk 17 suat a ni. ASF vanga vawk thi zat hi Kum 2021-22 khan 33,417 a ni a, kum 2022-23 ah 12,795 a ni a, kum 2023-24 chhungin 1,139 awmin, heti hian a vaiin ASF vanga vawk thi zat chu 47,351 a ni tawh a ni. ASF hri kai vanga vawk suat tawh zat hi kum 2021-22 khan 12,568, kum 2022-23 khan 11,686, kum 2023-24 chhungin 980 niin heti hian a vaiin vawk suat zat chu 25,234 a ni tawh a. Vawk thi avanga tanpuina dawng chhungkua 2,488 an awm tawh a. AH& Vety Dept chuan ASF vanga vawk chante tanpuina tur cheng nuai 311, sing 6 leh 6 an dil mek bawk.

Tunlai khawlum chhovah ASF hri a leng chho leh a, ran damlo nei an awm a nih chuan Animal Husbandry & Veterinary Dept phone no 1962 ah Doctor te biak rawn theih reng an ni tih AH & Vety Dept Deputy Director Dr.M. Zohmingthangi chuan a sawi a ni.

<><><>

## DENGUE SITUATION

Kum 5 chung (kum 2019 leh kum 2023) inkar chung khan Mizoramah Dengue hri vei mi 4,209 an awm a, an zinga mi 7 an thi.

Health and Family Welfare hnuai a State Vector Borne Disease Control Programme (SVBDPCP) hotute hnen atanga thudawn danin kumin January ni 1 leh April ni 30 inkar khan Dengue hri kai a rinhlelh mi 2,347 sample endikah mi 132-in he hri hi an kai tih hmuhchhuah a ni leh tawh a, thi erawh an awm lo.

<><><>

## 5<sup>TH</sup> PHASE LS ELECTION

Lok Sabha inthlanpui thawh 5-na, naktuka nei turin ruahmanna peihfel a ni tawh a, State 6 leh Union Territory 2 huamchhunga Lok Sabha bial 49 – Uttar Pradesh-a bial 14, Maharashtra-a bial 13, West Bengal-a seat 7, Odisha leh Bihar-a seat 5 ve ve, Jharkhand-a bial 3, Jammu & Kashmir leh Ladakh-a seat 1 ve ve-ah te, zing dar 7 atangin vote thlak a ni ang a, hemi rual hian Odisha Assembly seat 35-ah vote thlak nghal a ni ang.

Puan tawh thin angin, Lok Sabha inthlanpui hi thawh 7-a neih tur a ni a, thawh li zawh fel tawhah Lok Sabha seat 379-ah tluang takin vote thlak a ni tawh a, vote zaa 66.95 vel a tla a ni.

Hetih lai hian, inthlanpui kaihnawihha Election Commission hnuai a agency hrang hrangin dap chhuah hna an thawh naah thil chi hrang hrang, cheng vbch 8,889 hu an man tawh a, man zingah hian ruihhlo tam berin, cheng vbch 3,958 hu an man a ni.

<><><>